

Script Of Evening Gojri News Bulletin 21 June 2024 at 1700 Hrs

ايوننگ گو جری نیو ز بلیٹن مورخہ 21 جون 2024

یوہ آکا شوانی جموں ہے محمد مبارک ماہر نصرت چودھری تیں خبر سنو۔ پہلاں خاص خاص خبر۔

*1- وزیر اعظم نریندر مودی نے جموں کشمیر غا سرینگر مانہہ 10 واں عالمی یوگا تہاڑا غی تقریبات غی سربراہی کرتاں واں کہیو ہے جے دنیا یوگا ناہہ عالمی بھلائی غا سلسلہ مانہہ اک طاقتور کار گزار غا طور ور دیکھ رہی ہے۔

*2- لیفٹنٹ گورنر منوج سنہا غو کہنو ہے کہ یوگا بھلائی بہتری غا جسمانی نفسیاتی تے جذباتی پہلواں ناہہ بدھان مانہہ سب تیں اہم کردار ادا کرے۔

*3- دنیا پھر غا دوجا حصاں غی طرح جموں خطہ مانہہ وی 10 واں عالمی یوگا تہاڑو بڑا جوش و خروش نال منایو گیو ہے

*4- تے جموں کشمیر مانہہ اسمبلی انتخابات غی تیاریں بھارتی چناؤ کمیشن نے انتخابی فہرستاں غا خصوصی گوشوارہ ور نظر ثانی غو حکم دتو ہے۔

خبران غی تفصیل نال پہلاں محمد مبارک ماہر۔

PM Yoga Day

یوگا غو 10 ووں عالمی تہاڑو اج ساری دنیا مانہہ منایو جا رہیو ہے اس ضمن مانہہ مرکزی تقریب جموں کشمیر غا شہر سرینگر غا شیر کشمیر قومی کانفرنس مرکز ایس کے آئی سی سی مانہہ منعقد ہوئی۔ مذکورہ تقریب غو آغاز جموں کشمیر غا ضلع سرینگر مانہہ ہوو۔ اس موقع ور جموں کشمیر غا لیفٹنٹ گورنر منوج سنہا تے مرکزی وزیر پر تاپ راؤ گنپت راؤ جادھو تے کئی دوجی بستیاں نے وزیر اعظم غی سربراہی مانہہ حصو لیو۔ عالمی سطح ور یوگا غی بڑا پیمانہ ور اثر رسوخ غی عکاسی کرتاں واں بیرون ملک سفارت خانہ تے بھارتی مشن تقریبات مانہہ شامل وین گا۔ وزیر اعظم نے اس موقع ور اک اجتماع سنگ خطاب کرتاں واں یوگا غی جسمانی، ذہنی تے روحانی نمو ناہہ بابدو دین مانہہ یوگا غی اہمیت ناہہ اجاگر کرتاں واں دنیا پھر مانہہ اُن لوکاں ناہہ مبارکباد دتی جنہاں نے جشن غا طور ور مذکورہ یوگا تقریب مانہہ مظاہرہ کیو۔ وزیر اعظم نے کہیو کہ پوری دنیا مانہہ یوگا کرن آلا افراد غی گنتری مانہہ برابر بابدو ہو رہیو ہے۔ یوگا غا بابدو غا حوالہ سنگ گل کرتاں واں وزیر اعظم نے اس غی اہمیت بارے اپنا 2015 غا ترکمانستان غا دورہ غی گل دسی جد اُت اُن نے دسیو جے ترکمانستان غی ریاستی طبی یونیورسٹیاں مانہہ یوگا تھریپے ناہہ شامل کیو گیو ہے تے نال ہی سعودی عرب نے اس ناہہ اپنی تعلیمی نصاب غو وی حصو بنا یو ہے۔ وزیر اعظم نے دسیو جے یورپ غا ملک جرمنی مانہہ ڈھیڑ کروڑ شہری یوگا پیشہ ور ہیں۔ وزیر اعظم نے کہیو جے یوگا اج غا دور مانہہ تحقیق غو موضوع ہے اور مچ سار مقالہ اس ور لکھیا جا چکا ہیں۔ اس بہرے غا یوگا مرکزی موضوع بارے گل کرتاں واں اُن نے دسیو جے اس بہرے اس غو موضوع ”یوگا فار سیلف اینڈ سوسائٹی“ یعنی اپنے تے سماج واسطے یوگا ہے۔ یوگا غا فائدہ مانہہ شراکت داری ناہہ بدھان غا سلسلہ مانہہ وزیر اعظم نریندر مودی نے تمام گرام پردھان ناہہ چٹھی وی لکھیں تھیں جس مانہہ زمینی سطح غی شرکت تے دیہی علاقان مانہہ یوگا غا پھیلاؤ غی حوصلہ افزائی کی گئی ہے۔

IYD Jammu

ویشو یوگ سنستہا نے باگ باہو جموں مانہہ 10 ووں بین القوامی یوگا غو تہاڑو شاندار انداز نال منایو۔ اس تقریب مانہہ پُر جوش شرکاء بڑی تعداد مانہہ دیکھیا گیا۔ جہیڑا قدیم یوگا مانہہ شامل ہون غا خواہشمند تھا۔ خاص طور وں ور ات یوگ آسن غو اک سلسلو قائم تھو۔ ممتاز شخصیات جس مانہہ سابق نائب وزیر اعلیٰ کو یندر گپتا نے اس موقع وں شرکت کی نالے اس تقریب غی اہمیت نانہہ اُجاگر کیو۔ مہارا ضلع نمائندہ انکوش شرمناں گل کرتاں وں سابق نائب وزیر اعلیٰ کو یندر گپتا نے کہیو۔۔۔ بانٹ۔۔۔

IYD Toursim

جموں ٹوی گولف کورس مانہہ 10 ووں بین لاقوامی یوگ تہاڑو منایو گیو۔ جس مانہہ بڑی تعداد مانہہ شرکاء نے شرکت کی۔ جموں غا محکمہ نے اس تقریب غو اہتمام کیو۔ جس مانہہ حاضرین غے ذریعے مختلف یوگ آسن پیش کیا گیا۔ ممتاز شخصیات جس مانہہ محکمہ غی جوائنٹ ڈائریکٹر سُنینامہتا نے خصوصی طور وں شرکت کی۔ مہارا ضلع نمائندہ انکوش شرمناں گل کرتاں وں جوائنٹ ڈائریکٹر سُنینامہتا نے کہیو۔۔۔ بانٹ۔۔۔

IYD AIIMS

ضلع سانبہ مانہہ وجے پور غا مقام وں ایمز مانہہ اج 10 وں عالمی یوگ تہاڑو منایو گیو۔ اس موقع وں ممیر پا رلیمان جُگل کشور شرمنا مہمان خصوصی تھا۔ مذکورہ یوگ تقریب مانہہ ایمز جموں غا ڈائریکٹر شکتی کمار گپتا غے نال سابق وزیر چندر پرکاش گنگا تے دوجا اعلیٰ عہدیداران، ڈاکٹراں، تدریسی عملہ، ایمز غا طالب علمان تے وجے پور غا منیا پڑمنیا لوکان نے حصو لیو۔ اس موقع وں مہارا ضلع نامہ نگار ستپال شرمناں گل کرتاں وں ممیر پا رلیمان جُگل کشور شرمنا تے شکتی کمار گپتا نے اس طرح کہیو۔۔۔ بانٹ۔۔۔

IMD Kishtwar

اُتے ضلع کشتواڑ مانہہ عالمی یوگ تہاڑو منان غا سلسلہ مانہہ مرکزی تقریب چوگان گراؤنڈ مانہہ منعقد کی گئی۔ جس مانہہ 4 ہزار تین متا لوکان نے شرکت کی۔ مذکورہ تقریب ڈپٹی کمشنر کشتواڑ تے ایس پی کشتواڑ تیں علاوہ بکھ بکھ محکمان غا عہدیداران غی نگرانی مانہہ منعقد کی گئی۔ اس تقریب غے دروان ڈی سی کشتواڑ نے نوجوانان نانہہ یوگ غی اہمیت با رے دسیو بھالیو تے نال ہی منشیات تیں دور رہن تیں علاوہ یوگ نانہہ اپنی زندگی غو حصو بنان با رے ترغیب دتی۔ مہارا ضلع نامہ نگار کیلاش ناتھ سنگ گل کرتاں وں آیو ش محکمہ گا ڈاکٹر وکرم سنگھ جموال نے اس طرح کہیو۔۔۔ بانٹ۔۔۔

IYD Kathua

ضلع انتظامیہ کٹھوعہ نے 10 ووں بین القوامی یوگ تہاڑو اک عظیم الشان تقریب غو اہتمام کر غے منایو۔ جس مانہہ ”یوگا فار سلیف اینڈ سو سائٹی“ غا موضوع وں توجہ دتی گئی۔ سپورٹس سٹیڈیم کٹھوعہ مانہہ منعقد ہ اس تقریب مانہہ ہزاراں غی تعداد مانہہ افراد نے شرکت کی۔ جن مانہہ ڈپٹی کمشنر ڈاکٹر راکیش منہاس، ڈی ڈی سی چیرمین کرنل مہان سنگھ، صحت تے طبی تعلیم غا ایڈیشنل سیکریٹری چاند کشور شرمنا تے دیگر افسر شامل تھا۔ مہارا ضلع غا نمائندہ پر دیپ شرمناں گل کرتاں وں ڈپٹی کمشنر کٹھوعہ ڈاکٹر راکیش منہاس نے

اس طرح کہیو۔۔۔ با نٹ۔۔

یہ خبر تم آکاشوانی جموں تیں سن رہیا ہیں خبراں غا باقی حصہ نال نصرت چودھری۔

LG IYD

وزیر اعظم نریندر مودی نے سرینگر مانہہ یوگا مانہہ دلچسپی رکھن آلا ہزاراں لوکاں غے نال یوگا کیو۔ لیفٹنٹ گورنر منوج سنہا نے کہیو کہ جموں کشمیر مانہہ بین القوامی یوگا غو تہاڑو منان غو موقعو فراہم کرن واسطے وزیر اعظم غو شکر گزار ہوں۔ اس تاریخی واقعہ نے جموں کشمیر مانہہ عالمی نقشہ ور لیا غے کھلو کر دتو ہے۔ یوگا جسمانی، نفسیاتی تے جذباتی پہلوں مانہہ بدھان مانہہ اہم قرار ادا کرے۔ وزیر اعظم نے یوگا ساری دنیا تک پھیلايو ہے تے آج مہاری قدیم روایت ساری دنیا مانہہ قائم ہے۔ یوگا صحت مند زندگی در مہارو پہلو قدم ہے۔ یوگا مہارا اندر شعور غے ذریعے خوشی پیدا کرے۔

Shah IYD

مرکزی وزیر داخلہ امت شاہ نے کہیو ہے کہ بھارت نے پوری انسانیت مانہہ مچ ساری چیز دتی ہیں۔ ور یوگا دنیا مانہہ اس غو سب تیں بڑو تحفو ہے۔ یاه گل آج سویرے اُن نے احمد آباد مانہہ یوگا غا 10 واں عالمی تہاڑا غا موقع ور یوگا کرن تیں بعد کہی۔ اُن نے کہیو ہے نریندر مودی غا سال 2014 مانہہ وزیر اعظم بنن تیں بعد اُن نے اقوام متحدہ غی جنرل اسمبلی مانہہ 21 جون مانہہ یوگا تہاڑا با رے اک تجویز پیش کی تھی۔ جس مانہہ دنیا پھر غا 170 ملکاں نے متفقہ طور ور منیو تے آج اس مانہہ ہم عالمی یوگا تہاڑا غا طور ور منا رہیا ہاں۔

Agar Jitto Mela

ترے روزہ تاریخی آگار جیتو میلو آج مکمل ثقافتی تے مذہبی ماحول غے بشکار ڈھول غی تھاپ غے نال شروع ہوو۔ اس میلہ غو افتتاح ضلع ترقیاتی کمشنر ریاسی وشیش مہاجن نے کیو۔ مقامی لوکاں تے ملک پھر تیں آن آلا زائرین غی تعریف کرتاں واں ضلع ترقیاتی کمشنر نے کہیو ہے اس قسم غا تہوار ہم سب مانہہ علاقہ بھر پور ثقافت اور روایات مانہہ دیکھن غو موقعو فراہم کریں۔ چھیڑا بھائی چارہ تے فرقہ وارانہ ہم آہنگی مانہہ مضبوط کرن مانہہ مزید مدد کریں۔ اس موقع ور گل کرتاں واں ڈپٹی کمشنر وشیش مہاجن نے اس طرح کہیو۔۔۔ با نٹ۔۔۔

ECI Assembly Polls JK

چناؤ کمیشن نے ہدایت دتی ہے جے جموں کشمیر مانہہ ووٹر فہرستاں مانہہ تا تاریخ کرن غی ضرورت ہے۔ اس اپ ڈیٹ غی نوی آخری تاریخ آگلا مہینہ غی پہلی تاریخ ہے۔ یوہ جموں کشمیر اسمبلی انتخابات غی تیاریاں غو آغاز ہے۔ ہریانہ، مہاراشٹر تے جھارکھنڈ مانہہ وی اسمبلی انتخابات غی تیاریں شروع ہیں۔ ان ریاستاں مانہہ پہلی جو لائی تیں ووٹر فہرست تا تاریخ کی جائیں گی۔ ہریانہ تے مہاراشٹر مانہہ موجودہ اسمبلی اس سال نومبر مانہہ ختم ہو رہی ہے۔ تے جھارکھنڈ اسمبلی غی مدت آگلا سال جنوری مانہہ ختم ہو رہی ہے۔ حالیہ قانون مانہہ تبدیلی تیں بعد ہن سال مانہہ 4 دفعہ ووٹر لسٹ اپ ڈیٹ کی جائیں گی۔ اس

غو مقصد اس گل نانہہ یقینی بنانو ہے کہ تمام اہل شہری ووٹ دین واسطے اپنو اندراج کرا
سکیں۔

IYD SMVDSB

شری ماتا ویشنو دیوی شرائین بورڈ نے جموں کشمیر محکمہ سیا حت غا تعاون تیں اج 10
ووں بین القوامی یوگ تہاڑو شری ماتا ویشنو دیوی سپورٹس کمپلیکس کٹڑا مانہہ بڑا جوش
و خروش غے نال مناہیو۔ ”یوگا فار سیلف اینڈ سو سائٹی“ غا عنوان تیں منعقد ہون آلی اس
تقریب غو مقصد یوگ نانہہ انفرادی تبدیلی تے سماجی بہبود واسطے فروغ دینو ہے۔ اس
موقع ور خطاب کرتاں واں چیف ایگزکیٹو افسر شری ماتا ویشنو دیوی شرائین بورڈ انشول
گرگ نے کہیو کہ ماتا ویشنو دیوی غی مہربانی تے آشیرواد تیں کٹڑا شہر مانہہ سپورٹس غی
سہولت قائم کی گئی ہے۔ جت کھیڈ سرگرمیاں غے نال نال یوگ سیشن واسطے مہا ری
کمیونٹی مانہہ صحت تے تندرستی نانہہ فروغ دین واسطے لیفتنٹ گورنر منوج سنہا غی
صدارت مانہہ شرائین بورڈ غا عزم غو ثبوت ہے۔ سی ای او نے اج غی دوڑ پیج آلی دُنیا مانہہ
یوگا غی اہمیت ور زور دتو۔

اس غے نال ہی خبراں غو یوہ بلیٹن ختم ہوؤ۔